



Broj: 01/1-02-381/17  
Ilijaš, 23.02.2017. godine

**Z A P I S N I K**

sa 6. (šeste) sjednice Općinskog vijeća Ilijaš, održane dana 23.02.2017. godine, sa početkom u 10:00h.

Šestom sjednicom Općinskog vijeća Ilijaš predsjedavao je predsjedavajući OV-a Ilijaš g-din Mahir Dević.

Prisutni vijećnici:

<b>RB.</b>	<b>IME I PREZIME</b>
	<b>SDA</b>
1	MAHIR DEVIĆ
2	ANEL BUMBULOVIĆ
3	MUAMER DERVIŠEVIĆ
4	ALMA OMEROVIĆ
5	MEHMED SINANOVIĆ
6	ADEM ALIĆ
7	SAUDIN DURMIĆ
8	ARMIN MATORUGA
9	SEMIR DEDIĆ
10	HALID DIZDAREVIĆ
11	RASIM ŠEHIĆ
12	MELISA MATORUGA
13	ALEN HASKOVIĆ
	<b>SDP</b>
14	ALAN ŠERAK
15	DAMIR FILIPOVIĆ
16	MIRSAD OSMANOVIĆ
	<b>SBB-FAHRUDIN RADONČIĆ</b>
17	AKIF BEŠLIJA
18	SEAD ŠEHIĆ
	<b>BPS-SEFER HALILOVIĆ</b>
19	MUHAMED HANDŽIĆ
20	ALMIR ŠPIODIĆ
	<b>GS</b>
21	EDHEM HASANOVIĆ
22	-
	<b>DF</b>
23	SEMIR DIZDAREVIĆ
	<b>LDS</b>
24	MEHO DŽINDO
	<b>STRANKA ZA SREDNJE</b>
25	-

Odsutni vijećnici:

1. Asim Mujić i
2. Besim Gljiva

Prisutni gosti:

1. Aida Muratović-Radio Ilijaš
2. TV Vogošća
3. Mehmed Smajlović – predsjednik Savjeta MZ Mrakovo
4. Meho Mešetović – predsjednik Savjeta MZ Ilijaš Grad
5. Mirsad Hamzić – predsjednik Savjeta MZ Malešići
6. Alen Matoruga – predsjednik Savjeta MZ Misoča
7. Nijaz Šitkovac – direktor OJ Dom zdravlja "Ilijaš"

Ostali prisutni:

1. Akif Fazlić – općinski načelnik
2. Sanja Zagorac-Jozić – pomoćnik načelnika
3. Sadeta Brkić – pomoćnik načelnika
4. Meliha Avdibegović – pomoćnik načelnika
5. Zdravko Barić – pomoćnik načelnika
6. Nijaz Spahić – pomoćnik načelnika
7. Ilda Kahrman – sekretar OV-a Ilijaš
8. Muvedeta Fazlić – šef odsjeka za opću upravu
9. Vahid Hadžiabdić – građevinski inspektor
10. Sadik Alić – komunalni inspektor
11. Adha Masnopita – stručni saradnik u Službi za društvene djelatnosti
12. Maida Habibović – zapisničar
13. Dženan Sušta – IT administrator

MAHIR DEVIĆ – predsjedavajući

Otvorio je sjednicu i konstatovao da postoji kvorum za odlučivanje (prisutna 23 vijećnika).

Zatim je dao na razmatranje zapisnik sa 5. sjednice OV-a. Primjedbi nije bilo, pa je OV-e jednoglasno usvojilo zapisnik sa 5. sjednice OV-a.

Pročitao je predloženi dnevni rede i dao na razmatranje.

MIRSAD OSMANOVIĆ – vijećnik SDP-a

Prokomentarisat ću kvalitet materijala i tačku 7. i tačku 10. Razmišljao sam i o tački 6., a vjerovatno će predlagač sam ocijeniti da li će ova tačka ostati na dnevnom redu ili će je doraditi.

Zadanje 3-4 sjednice Vijeća dobivamo materijale, odnosno ispravljamo neke greške, dobivamo materijale za što općinsko vijeće nije nadležno, poništavamo ranije odluke koje su bile objavljene u službenim listovima i želim reći da se ne poštuju neke odluke Vijeće, zaključci Vijeća, kada se tiče opremanja predloženog dokumenta vezano za skice. Dalje, pri izradi dokumenata jednostrano se posmatra problematika koju reguliše predloženi dokument. Što se tiče prijedloga Odluke o davanju saglasnosti, i još jedno, imamo par odluka koje su izuzeće u zakonu. Postoji pravni osnov i to je tačno, ali su izuzeća, a vezana su za javni interes i javna dobra, tako da je ta tematika posebno osjetljiva i

predlagač i mi ovdje treba da posebno obratimo pažnju prilikom usvajanja takvih dokumenta. Kada se tiče tačke 7. volio bih da tehnika bude uredu, prije svega zbog lične odgovornosti mene kao vijećnika i KV SDP-a kada se tiče budućnosti zaštićene zone, kada se tiče budućnosti Bijambara i kada se tiče budućih planova razvoja tog područja i komplet bazena do Dragorada, odnosno desno do Gajeva. Pravni osnov postoji, ali volio bih da je predlagač pored Zakona koji reguliše ovu oblast pročitao i Zakon o zaštiti prirode, pročitao refleksije koje će se desiti kada se tiče lociranja kamenoloma i kakav je to objekat i koliki uticaj ima na životnu sredinu i kakav uticaj ima na staništa biljnog i životinjskog svijeta. Sa ovom odlukom otvaramo vrata da se proces završi, da nadležno ministarstvo završi i nadležna komisija, ali smo odgovorni prema građanima, jer ovaj objekat se pravi na "vratima" zaštićene zone. Same eksplozije koje se moraju dešavati, kamena prašina, sigurno će sve buduće planove narušavati, a naša strategija je razvoj turizma, poljoprivrede, lovstva na tom području. Zato vas molim i neću pitati predlagača da li je, prilikom prijedloga ove saglasnosti, razmišljao o Zakonu o zaštiti prirode i da li je bar pročitao direktivu o pticama Evropske unije i da ne idem dalje. Smatram da je ovo ozbiljna stvar i da trebamo biti odgovorni prema ljudima, zajednici i budućim generacijama. Da ne govorim o bezbjednosti putnog pravca Bijambare, Dragoradi, Gajevi i molim vas da još jednom razmislite, da predlagač povuče ovu tačku sa dnevnog reda i da uzme u obzir razvojne planove tog lokaliteta, Zakon o zaštiti prirode i da onda donesemo odluku da mi damo saglasnost ako se nađe opravdanost. Ja tu opravdanost ne vidim. Niko neće praviti motel blizu kamenoloma. Kada se tiče ekonomske opravdanosti, mi ćemo dugoročno imati 80.000,00 KM. Vjerujem da ona naselja koja će biti ometena radom ovog kamenoloma, daju dugoročno više kroz porez, da ne govorim o lovcima i planinarima i ozbiljno upozoravam predlagača i vijećnike da razmislimo o ovome da zbog sitnice ne budemo napravili ogromnu štetu.

Kada se tiče ovog drugog, iz pristojnosti sam prošli put zatražio da se za izmjenu odluke zatraži mišljenje Pravobranilaštva Kantona Sarajevo, jer se radi o javnom dobru, međutim, vjerujem da bi i mnogi vijećnici reagovali kao i ja da je predlagač poštovao zaključke Vijeća.

Dakle, predlažem da se tačka 7. i 10. povuče sa dnevnog reda i da predlagač za narednu sjednicu Vijeća pripremi dokument da se ova Odluka iz tačke 10. potpuno poništi iz razloga zbog javnog interesa građana.

ALAN ŠERAK – vijećnik SDP-a

U ranijem sazivu Vijeća, donesen je zaključak da se uz dokumente iz imovinsko pravne službe dostavljaju skice lokacije, a u ovom slučaju to ne vidim i ja ću se pridružiti kolegi Osmanoviću i predložiti da se tačka 10. povuče sa dnevnog reda.

MUHAMED HANDŽIĆ – vijećnik BPS-a

Predlažem da se tačka 6. povuče sa dnevnog reda, obzirom da nisu prikupljeni svi, zakonom predviđeni elementi da bi je mogli razmatrati na ovoj sjednici Vijeća. To potvrđuje i odgovor Kolegija OV-a koji je dat Kulturno umjetničkom društvu "Ilijaš" i Mjesnoj zajednici Ilijaš Grad gdje ste napisali da niste nadležni za rješavanje i razmatranje ovih procedura. Dio ove tačke ide kroz budžet i tiče se rekonstrukcije i ja jesam za to, a kada se tiče drugog dijela ove tačke - preimenovanje dijela KSC-a u Biznis forum centar, mislim da nisu ispunjeni svi zakonski uslovi za donošenje ove odluke (nije održana javna rasprava i nismo dobili određene saglasnosti od većih nivoa vlasti za ovo).

AKIF FAZLIĆ – općinski načelnik

Kao predlagač, ostajem pri predloženom dnevnom redu i smatram da niti jedan od navedenih argumenata nema dovoljnu osnovu i snagu u zakonu u smislu da prijedlozi materijala vezano za ove tri tačke nisu pripremljeni na adekvatnom nivou i zbog toga sam stava da ove tačke budu sastavni dio dnevnog reda, naravno ako ih Vijeće usvoji.

MAHIR DEVIĆ – predsjedavajući

Dao je na glasanje predloženi dnevni red.

Općinsko vijeće Ilijaš je sa 16 glasova ZA, 6 PROTIV i 1 UZDRŽANIM usvojilo slijedeći

#### DNEVNI RED

1. Vijećnička pitanja i inicijative
2. Izvještaj o realizaciji zaključaka sa 5. sjednice
3. Izvještaj o radu općinskog načelnika i službi za upravu općine Ilijaš za period 01.01.-31.12.2016. godine
4. Operativni plan općinskog načelnika i službi za upravu općine Ilijaš za period 01.01.-31.12.2017. godine
5. Prijedlog Odluke o dodjeli javnih priznanja Općine Ilijaš za 2016. godinu
6. Prijedlog Odluke kojom se daje saglasnost općinskom načelniku za provođenje zakonom propisane procedure postupka rekonstrukcije i promjene namjene dijela nekretnine – zgrade (aula Kulturnog centra Ilijaš)
7. Prijedlog Odluke o davanju saglasnosti za provođenje postupka dodjele koncesije za eksploataciju mineralne sirovine – krečnjaka na lokalitetu "Sabanci" općina Ilijaš
8. Prijedlog Odluke o pristupanju izradi Regulacionog plana "Apartmansko naselje Sovrle 2" – Ilijaš
9. Prijedlog Odluke o izmjeni podataka od značaja za pravni promet i o izmjeni osnivačkog akta Javnog komunalnog preduzeća "Vodostan" d.o.o. Ilijaš
10. Prijedlog Odluke o izmjeni člana 1. Odluke Općinskog vijeća Općine Ilijaš br.01/1-02-1726-12/16 od 26.07.2016. godine
11. Prijedlog Rješenja iz imovinsko-pravne oblasti broj:06/1-31-155/17

#### AD-1

#### Vijećnička pitanja i inicijative

MEHO DŽINDO – vijećnik LDS-a

Pitanje:

1. Upućujem Ministarstvu prostornog uređenja i zaštite okoliša Kantona Sarajevo, Upraviteljima na održavanju zajedničkih dijelova zgrada i upravljanje zgradama, kao i Službi za prostorno uređenje i stambeno-komunalne poslove općine Ilijaš, u čijoj je nadležnosti održavanje i opremanje hidrantske mreže i vatrogasnih aparata u stambeno-poslovnim objektima na području općine Ilijaš?

Obrazloženje: Svima nama je poznato da je održavanje zajedničkih dijelova zgrada i upravljanje zgradama na području Kantona Sarajevo uređeno Zakonom o održavanju zajedničkih dijelova zgrade i upravljanje zgradom ("Službene novine Kantona Sarajevo",

broj:3/12). Međutim, šanse da se na vrijeme spasi nečiji život u slučaju izbijanja požara na području naše općine su minimalne. To se pokazalo i prilikom nedavnog požara koji je izbio na Banovcu i na neboderu u Alipašinom polju, u kojem je dvoje ljudi u teškim mukama izgubilo život. Nažalost, ovakve tragedije i ubuduće su neizbježne, jer u većini slučajeva ne postoji predviđena oprema za gašenje požara, adekvatni prilazni putevi, požarna stubišta, prilazi za vatrogasce i sl. Sve ovo što sam naveo ne postoji u zgradi u kojoj ja stanujem, a i u svim zgradama koje su starije izgradnje, a takvih je mnogo na području naše općine. Na svakom spratu postavljeni su, prilikom izgradnje zgrade, zidni šahtovi-setovi u kojima su se nalazila hidrantska crijeva sa mlaznicom. Ti setovi su bili ustakljeni i u slučaju požara staklo se razbije i veoma brzo se aktivira hidrantska mreža. Sada nijedna stara zgrada nema opremu za gašenje požara (hidrantsko crijevo sa mlaznicom, aparat za gašenje požara, požarne stepenice i sl.). Nažalost, ovi setovi-šahtovi sada služe kao male ostavke za drva ili obuću. Mi smo svjesni da su zajednički dijelovi naše zgrade naša zajednička i nedjeljiva svojina, te da smo je dužni održavati. Ali mi nismo u mogućnosti izvršiti nabavku neophodne opreme za osposobljavanje hidrantske mreže i nabavku vatrogasnih aparata. Naknadu za održavanje zajedničkih dijelova zgrada i upravljanje zgradom većina stanara uredno plaća, a za uzvrat od tih sredstava godišnje se dva puta očiste dimnjaci i jednom sedmično očisti stubište. Ne vrši se redovna deratizacija i dezinfekcija stubišta i podrumskih prostorija, a sve ostale usluge po pozivu trostruko se više naplate od stvarne cijene. Ne znam da li je usvojen novi zakon iz ove oblasti, ali ovakvo stanje je neodrživo, jer kad se dogode gubici ljudskih života i materijalnih dobara biće kasno. Stoga molim da mi se da odgovor na naprijed navedeno pitanje. Osim toga, u mandata kada sam u periodu 2008-2012. godine bio vijećnik, usvojen je jednoglasno zaključak po kojem nadležna služba prilikom dodjele na korišćenje stana, odnosno razmatranje zahtjeva za produženje prava privremenog korišćenja neće izdati rješenje ukoliko podnosilac zahtjeva ne plaća naknadu za održavanje zajedničkih dijelova zgrada.

Da li se ovaj zaključak sprovodi, s obzirom da je nakada za ovo održavanje kako stoji u ranijem izvještaju službe veoma niska. Ja smatram da nije visoka, stoga svi treba da je plaćaju, bez obzira da li su vlasnici ili privremeni korisnici stana.

SEMIR DIZDAREVIĆ – vijećnik DF-a

Inicijativa:

1. Pokrećem inicijativu da se izvrši zamjena slivne rešetke u ul. Hašima Spahića prema Karašnici.

Obrazloženje: Na osnovu inicijative stanovnika ovog područja pokrećem inicijativu za zamjenu slivne rešetke duž cijele ulice. Slike postojeće rešetke su u prilogu ove inicijative.

Pitanje:

1. Kada je rađeno popločavanje trotorara u ul. 126. Ilijaške brigade iznad igrališta Srednjoškolskog centra "Nedžad Ibrišimović" Ilijaš, da li je istekao garantni rok za navedene radove?

Obrazloženje: Nakon jake zime i snježnih padavina vidljiva su oštećenja galanterije (ploča) ugrađenu u pločnike, jer je vrlo vjerovatno ugrađena nekvalitetna ili neotporna na minuse i posipni materijal za održavanje tokom zime. Vremenom će se ova oštećenja proširiti i ista će biti potrebno sanirati, što zbog izgleda što zbog bezbjednosti građana, učenika i djece koja idu u obližnji vrtić. Ne želim da mi kao Općina plaćamo ponovnu situaciju ako smo

platili izvođenje radova. Molim da mi se dostavi kopija sklopljenog ugovora sa izvođačem pomenutih radova.

#### SAUDIN DURMIĆ – vijećnik SDA

Izražavam nezadovoljstvo zbog ne dobijanja odgovora na vijećnička pitanja i inicijative na decembarskoj sjednici. Naime, postavio sam dvije inicijative upućene prema Direkciji za ceste Kantona Sarajevo i na iste do današnje sjednice nisam dobio odgovor, te iste ponovo pokrećem:

##### Inicijative:

1. Tražim da se saobraćajno ogledalo na lokalnom putu Ilijaš Stari-Misoča zamjeni, jer je već duži vremenski period razbijen. Napominjem da sam i u prošlom mandatu postavljao istu inicijativu (maj 2016. godine).
2. Na molbu građana Mjesne zajednice Misoča i Popovići, kao i vozača javnog gradskog prevoza na općini Ilijaš tražim da se uputi inicijativa prema Direkciji za puteve Kantona Sarajevo da putem izvođača izvrše raskresavanje nepreglednih dijelova saobraćajnica na putnim pravcima Čevljanovići-Gajevi, Ilijaš-Popovići i Ilijaš-Gornja Misoča.

#### ALMIR ŠPIODIĆ – vijećnik BPS-a

I ja izražavam nezadovoljstvo zbog toga što nisam dobio odgovore na postavljena vijećnička pitanja i inicijative sa prošle sjednice Općinskog vijeća. Zato ću ponovo pokrenuti ista pitanja.

##### Pitanja:

1. Koliko je sklopljeno bračnih zajednica u periodu od 01.01.2013. godine do 30.12.2016. godine, gdje jedan supružnik ima strano ili dvojno državljanstvo?
2. Zahtjevam od Zavoda za zapošljavanje općine Ilijaš da dostavi podatke koliko je osoba registrovano kao nezaposleno za period januar 2017. godine.  
Također, od istog Zavoda zahtjevam da mi se dostavi izvještaj po slijedećim elementima:
  - Koliko je osoba skinuto sa biroa za zapošljavanje u protekle 3 (tri) godine, a koji su zasnovali radni odnos u BiH?
  - Koliko je osoba skinuta sa biroa za zapošljavanje zbog neredovnog javljanja i isteka prava po starosnoj dobi?
  - Koliko je osoba skinuto sa biroa za zapošljavanje zbog napuštanja BiH i odlaska u druge zemlje;
  - Koliko je osoba skinuto sa biroa za zapošljavanje po osnovu primanja koja prelaze preko 208,00 KM?

#### MUHAMED HANDŽIĆ – vijećnik BPS-a

Također i ja izražavam nezadovoljstvo zbog toga što nisam dobio odgovor na postavljenu inicijativu koju sam pokrenuo u julu prošle godine koja nije realizovana i nisam dobio odgovor na nju. Postavio sam je ponovo u decembru, a tiče se preimenovanja naziva sportske dvorane Ilijaš u Sportsku dvoranu "Rašid Buća".

Dobio sam odgovor da će to rješavati upravljačke strukture, da li to nešto mijenja u njihovoj personalizaciji. Ako te upravljačke strukture tako rade i treba im godinu dana da se jednom sastanu, onda se pitam čemu tolike naknade za njihov rad u KSC-u. Dakle, vrijeme je da dobijem odgovor. Ako može, neka se izvrši preimenovanje, a ako ne može, neka se da odgovor zašto ne može.

MIRSAD OSMANOVIĆ – vijećnik SDP-a

Pridružujem se primjedbama zbog toga što se ne odgovara na vijećnička pitanja i inicijative. Ja sam imao 20-ak pitanja i inicijativa i na jedan manji broj sam dobio odgovore. Više mi se čini da neko ima pjesničku inspiraciju kada mi odgovora, a u drugom dijelu kao da mi odgovara izvođač radova za koje sam radove pitao. Što se tiče pitanja koje je postavio Halid, nadam se i biće mi zadovoljstvo ako bar njemu odgovore na ovo pitanje, a ono je jedan od gorućih problema kada se tiče niskogradnje na području općine Ilijaš. Kao predsjednik Etičke komisije imam prijedlog da vijećnici poštuju Poslovnik o radu kada se tiče napuštanja sjednice i da se prijavljuju predsjedavajućem ili sekretaru. Drugo, da bi izbjegli neugodnosti kada se tiče dodjele pomoći našim sugrađanima koji su bolesni, treba da sačuvamo dignitet vijećnika, jer bitna je informacija kome treba pomoć, a da vijećnik popuni izjavu kod sekretara ili službe vijeća, koji želi da donira svoj novac.

Pitanje:

1. Tražim informaciju kakva je sudbina garaže SDP-a u zgradi A-3?

ALAN ŠERAK – vijećnik SDP-a

Pitanja:

1. Zašto se nikada nije na dnevnom redu Općinskog vijeća našla tačka "Transparentnost rada Općinskog vijeća, što podrazumijeva registar vijećničkih pitanja" i na oficijelnoj web stranici općine i snimanje sjednica za youtube kanal općine, a o čemu smo se prethodno usaglasili?
2. Kada je planirano pružanje komunalne mreže otpadnih voda u naselju Vlaškovo?
3. Tražim da mi se dostavi Operativni plan zimskog održavanja lokalnih puteva za sezonu 2017/2018. kao i Operativni plan za proteklu sezonu.
4. Postavljam pitanje na koji način je izabran izvođač radova na izgradnji parking prostora na lokalitetu Banovac, tačnije prostor između OŠ "Hašim Spahić" i džamije Novi Ilijaš? Također, zanima me ko je izvodio radove i kolika su ukupna izdvajanja iz budžeta bila po ovom pitanju?
5. Tražim da mi se dostavi Okvirni sporazum za protekle tri godine kao i pojedini ugovori proistekli iz istog, uz obavezna mišljenja NO vezano za izvođenje radova.
6. Koliki iznos je pravni subjekt "Halilović" d.o.o. inkasirao do sada za izvođenje raznih radova na području Općine Ilijaš od kada je isti odobren pa sve do danas?
7. Postavljam pitanje prema EP BiH, a vezano je za promet električne energije, odnosno može li pravni subjekt vršiti daljnju distribuciju električne energije prema trećim licima?

MEHMED SINANOVIĆ – vijećnik SDA  
ANEL BUMBULOVIĆ – vijećnik SDA

Inicijativa prema nadležnom komunalnom inspektoratu.

Inicijativa:

1. Podnosimo inicijativu za izlazak na teren komunalnog inspektora na lokaciju ulice Polomska put prema naselju Vratuša da utvrdi izvor dotoka veće količine vode na cestu. Nakon utvrđivanja izvora nastale vode zahtjevamo da se iznađe odgovarajuće rješenje za uklanjanje, sanaciju i prevenciju budućih izljeva vode.

AD-2

Izveštaj o realizaciji zaključaka sa 5. sjednice

MUHAMED HANDŽIĆ – vijećnik BPS-a

I ovo je potvrda da na liniji predsjednici savjeta mjesnih zajednica i savjeti mjesnih zajednica (dobar dio njih) ne rade svoj posao, pa im je teško dostaviti i izvještaj službi, a ne znam zbog čega služba ne pokrene odgovornost prema tim ljudima. Navest ću jedan primjer. Ja sam član savjeta MZ Luka i imamo člana koji nikada nije došao na sastanak i trebamo ga zamijeniti novim članom i mi to ne radimo. Nije dostavljen prijedlog Vijeću da zamijenimo tog člana i isto to imamo i u Dragoradima gdje treba biti pet članova savjeta mjesne zajednice. Zbog čega to ne radimo. Zašto da glasamo za ovaj zaključak da je izvršen.

Kolege vijećnici, ima niz anomalija u radu savjeta mjesnih zajednica i Vijeće i nadležna služba bi trebali mnogo više pažnje posvetiti njihovom radu.

MAHIR DEVIĆ – predsjedavajući

Zaključak je u suštini realiziran. Sve ovo što ste kazali jeste manjkavost naše odluke u kojoj nismo definisali šta u konkretnim slučajevima uraditi (kako razrješavati, kako imenovati nove članove) i to treba biti predmet neke nove rasprave, ali zaključak kao zaključak je realiziran. Dostavljena su mišljenja i mislim da možemo prihvatiti ovaj izvještaj o realizaciji zaključaka, a ovo sve što ste govorili, pridružujem se, ali naravno kada dođemo do nove priče za mjesne zajednice i tada trebamo donijeti novu odluku u kojoj definisati kao zamijeniti članove savjeta, pod kojim uslovima itd.

AKIF BEŠLIJA – vijećnik SBB-a

Ne mogu da se složim da ljudi koji predstavljaju mjesnu zajednicu da ovako rade i ovako se ponašaju i de ne znaju stvarno stanje. Ja pouzdano znam i tvrdim da u Savjetu Mjesne zajednice Ljubnići, od sedam članova, samo četiri rade. Jedan od tih članova je već u Srebrenici, drugi na Vratuši, treći je umro, a dobivamo informaciju da je predsjednik savjeta dostavio izvještaj da nema nikakvih izmjena.

MAHIR DEVIĆ – predsjedavajući

Jedino predsjednik savjeta MZ Ljubnići nije dostavio informaciju.



AKIF BEŠLIJA – vijećnik SBB-a

Ja sam shvatio da je stanje uredu, iako nije dostavio izvještaj.

MAHIR DEVIĆ – predsjedavajući

Mi nemamo niti jedno novo ime koje bi imenovali u savjet mjesne zajednice. Ono što je bilo do nas, mi smo uradili.

Obzirom da diskutanata po ovoj tački dnevnog reda više nije bilo, Općinsko vijeće je većinom glasova usvojilo

Izvještaj o realizaciji zaključaka sa 5. sjednice

AD-3

Izvještaj o radu općinskog načelnika i službi za upravu općine Ilijaš za period  
01.01.-31.12.2016. godine

AKIF FZLIĆ – općinski načelnik

Izvještaj je detaljan i transparentan i drago mi je da imate punu informaciju kada su u pitanju svi projekti, kada su u pitanju službe, kada je u pitanju rad sa strankama itd. Svi parametri pokazuju da je 2016. godina bila najuspješnija s aspekta realizacije programa, postignutih rezultata i dalje afirmacije naše lokalne zajednice. Dakle, budžet je izvršen sa 12,5 miliona KM i to je najveće izvršenje budžeta. Imali smo ekonomski rast koji je na nivou 6,3% kada je u pitanju rast industrijske proizvodnje i kada je u pitanju rast izvoza. Imali smo zapošljavanje gdje je ostvaren rast od 18,6% i ubjedljivo najveći rast u Kantonu Sarajevo i vjerovatno među najvećim u Federaciji BiH. Sa 30.novembrom došli smo do 3913 radnih mjesta na području naše općine. Ovaj visok nivo poslovnih aktivnosti je jako bitan, a parematri za pokazivanje tih aktivnosti može se naći u budžetu.

Izdato je veliki broj dozvola, pokrenuta je i izgradnja.

Velika je aktivnost kada je u pitanju prostorno planska dokumentacija.

Želim iskazati veliko zadovoljstvo vezano za aktivnosti katastra kroz izradu novog predmjera na gornjem kraju, harmonizaciju ovdje na katastarskoj općini Ilijaš i proširenje katastarskih općina kroz pripremu za adresni registar i niz aktivnosti koje dovode naše građane u poziciju da svoju imovinu mogu puno lakše registrirati i identifikovati. Puno smo uradili na daljem razvoju sistema elektronske uprave i opremanju organa uprave. Velike investicije u infrastrukturi i urbanizaciji gotovo cijelog područja su obilježile 2016. godinu. Zadržan je visok nivo komunalnih usluga koje pružaju naša komunalna preduzeća koja djeluju na području općine Ilijaš.

Kada je u pitanju infrastruktura želim naglasiti da smo zaista u 2016. godini bili okrenuti, prije svega, društvenoj infrastrukturi, a to je obrazovanje i zdravstvo. U obrazovanju smo imali 1,2 miliona ulaganja u objekte obrazovanja i gotovo svi objekti osnovnih škola dovedeni su na jedan visok i zavidan nivo. U oblasti zdravstva, doveli smo objekat doma zdravlja na nivo da će obezbijediti prostore za dodatne zdravstvene funkcije. Kada je u pitanju stanovanje, moram reći da smo imali projekat zbrinjavanja roma. U oblasti sporta i kulture imali smo određena ulaganja. Finansijski, najveća ulaganja imali smo u saobraćajnu infrastrukturu. Značajan projekat je modernizacija putne infrstrukture iz sredstava OKFŠ-a gdje smo na gornjem kraju realizirali projekte vrijednosti cca 1 miliona KM i taj projekat nije završene zbog zimske sezone. Također, općina je iz svog budžeta

finansirala nekoliko lokalnih puteva i imali smo projekata koje je finansiralo Federalno ministarstvo, a prije svega, mislim na put u Industrijskoj zoni Luka. Kada je u pitanju komunalna infrastruktura nastavili smo ono što godinama radimo kroz faze realizacije pojedinih projekata, kada je u pitanju kanalizacija radi se (Ljubnići, Luka, Karaula, Stari Ilijaš, Podlugovi-Ilna). Dva su značajna komunalna projekta - uređenje mezarja u Starom Ilijašu i Ljubnicima. Kada je u pitanju vodosnabdijevanje, modernizacija vodoopskrbnog sistema Junakovac, kao i početak značajnih infrastrukturnih rekonstrukcija gradskog vodovoda (potez Alića Bara – stadion i Mrakovo potez Pavlovići i rekonstrukcija rezervoara srednje zone). Također, tri projekta vezano za uređenje korita rijeka (završen projekat Stari Ilijaš od mosta na regionalnoj cesti do mosta na željezničkoj stanici, završen projekat uređenja korita rijeke Rače pored škole u Srednjem i započeta jedna dionica u Misoči na potezu između dva mosta kod džamije).

U sferi javne rasvjete ovo je bila ubjedljivo najpovoljnija godina gdje je instalirano preko 370 novih rasvjetnih tijela.

Ovo je jedan okvir aktivnosti koji je bio u 2016. godini i čijom realizacijom su zaista stvorene dobre pretpostavke za nastavak ovih projekata i još puno ljepši grad i općinu i njegov dalji i brži ekonomski razvoj.

MIRSAD OSMANOVIĆ – vijećnik SDP-a

Što se tiče izvještaja, dokument je transparentan i dobar, međutim, ukazat ću na nekoliko stvari na koje sam i ranije ukazivao. Što se tiče realizacije planova, odnosno strategije razvoja koja se završava sa ova dva dokumenta (ovaj i naredni). Evidentno je, finansijski pokazatelji, i kada vidimo prihode i rashode i detaljno razrađeni projekti, vidimo da tim za implementaciju strategije nije radio i komisija za monitoring, jer značajni projekti koji se završavaju sa ova dva dokumenta, nisu odrađeni kako treba. Suština je što nemamo ravnomjerni razvoja općine Ilijaš, pa i samog jezgra grada. Da smo više pratili, kada se tiče strategije, sigurno bi došlo do nekih korekcija, a ne umanjujući vrijednost projekata koji su odrađeni. Zamolio bih, u budućnosti, kada budemo ponovo radili strategiju 2017.-2023. da ne budemo neke značajne projekte koji bi trebalo da budu zamajac, ne prepisemo 2023.godine. Taj dio umanjuje i još jedno, kada je ovako dobro urađen dokument, trebalo bi, kada se tiče kvaliteta urađenih radova, da načelnik i nadležne službe insistiraju da radovi budu urađeni prema tenderskom zahtjevu. Znači, da se povede računa o kvalitetu urađenih radova.

Diskutanata po ovoj tački dnevnog reda više nije bilo, pa je OV-e jednoglasno usvojilo

Izvještaj o radu općinskog načelnika i službi za upravu općine Ilijaš za period  
01.01.-31.12.2016. godine

AD-4

Operativni plan općinskog načelnika i službi za upravu općine Ilijaš za period  
01.01.-31.12.2017. godine

AKIF FAZLIĆ – općinski načelnik

Osnovi za izradu ovog Operativnog plana sadržani su u Budžetu općine Ilijaš za 2017. godinu, u Strategiji razvoja općine Ilijaš, dokumentu okvirnog budžeta općine Ilijaš 2015-2017.godinu, planovima i programima Vlade Kantona Sarajevo, planovima i programima javnih preduzeća, planovima i programima rada službi općine Ilijaš i definisanim mjerljivim

ciljevima općine Ilijaš za 2017. godinu. Operativnim planom su utvrđeni i definisani projekti čijom realizacijom će se prije svega nivo izgrađene infrastrukture u oblasti saobraćaja, vodosnabdijevanja, elektroosnabdijevanja i ostalih komunalnih funkcija, društvenih djelatnosti, ekologije i zaštite životne sredine, rada mjesnih zajednica i organa uprave i dr. podići na još veći nivo i započeti izgradnje nove, što će uveliko poboljšati uslove života stanovništva općine Ilijaš u svim njenim dijelovima. Najznačajnije aktivnosti u 2017. godini biće u oblasti dalje modernizacije putne infrastrukture, vodosnabdijevanja i poboljšanja poslovnog ambijenta. Važno je napomenuti da će se realizacijom projekata definisanim u oblasti privrede i poljoprivrede, kao što je nastavak subvencioniranja poljoprivredne proizvodnje, izgradnja javne tržnice, otvaranje biznis centra, uvođenje novih poticaja za poslovne ideje i start-up biznis, a posebno dalja ulaganja u industrijsku zonu Luka, stvoriti ambijent i uslovi za novo zapošljavanje i ekonomski rast općine Ilijaš. Također, ponukani iskustvom velikih poplava prije dvije godine, cilj nam je urediti korita rijeka Ljubine, Rače i Misoče, snimiti klizišta i preventivno djelovati u ovoj oblasti. Stalni cilj je stvaranje imidža općine Ilijaš kao mjesta ugodnog življenja što nameće važnost prioritetiranja velikog broja projekata iz oblasti društvene infrastrukture i zaštite okoliša što je ovim planom značajno naglašeno. Rokovi za realizaciju nekih od projekata biće uslovljeni aktivnostima nosilaca, finansijera i implementatora projekata, prije svega Vlade Kantona Sarajevo i njenih nadležnih ministarstava i direkcija, kao i investitora.

MEHO DŽINDO – vijećnik LDS-a

Drago mi je što je u ovaj Operativni plan uvršteno asfaltiranje puta Novo Naselje-Gornje Mrakovu u dužini od 500 m.

Kada je u pitanju javna rasvjeta, uvrštena su mnoga sela i zaseoci, ali mi nije jasno zašto nije stavljena nadogradnja javne rasvjete od raskrsnice Gornje Mrakovo (Karašnica) prema Bogdanovićima. Predložio bih, ako ima mogućnosti, da se i ovo uvrsti.

ALAN ŠERAK – vijećnik SDP-a

Koliko vidim, Direkcija za ceste Kantona Sarajevo nam je prepolovila sredstva u odnosu na prošlu godinu, ali imajući u vidu da je godina bila izborna, imam i razumijevanja. Imam jedan prijedlog u vidu amandmana, pa neka se načelnik izjasni, a tiče se obezbjeđenja grijanja za područne škole. SDP-e je podnosio inicijativu da se grijanje uradi u područnim školama Bioča, Dragoradi i Kamenica. Ovdje vidim dvije područne škole, a ne vidim Kamenicu, a imajući u vidu da ne trebaju značajnija sredstva, moj prijedlog je da se i to nađe u Operativnom planu za ovu godinu nadam se da ćemo isto uspjeti realizovati. Ono što mi "para" oči uistinu, vidim da je u ovom Operativnom planu predviđena rekonstrukcija fekalne kanalizacione mreže u Donjoj Misoči, tačnije u Matoruginom Hanu. Postavio bih pitanje načelniku, kada je ista napravljena i ko je bio izvođač radova?

MUAMER DERVIŠEVIĆ – vijećnik SDA

Čestitam načelniku i službama Općine Ilijaš na činjenici da su vodili računa o svim naseljenim mjestima. Nećemo sada detaljisati i možda nedostaje negdje par sijalica, ali kao što možemo vidjeti u Operativnom planu da u svim naseljenim mjestima ima barem jedan, a kao što vidimo u planu ima i više projekata. U ime KV SDA i u svoje lično ime čestitam na ovako optimističnom planu i mi ćemo podržati ovaj Operativni plan.

MUHAMED HANDŽIĆ – vijećnik BPS-a

Za ovih pet godina kako sam ja u Vijeću, prvi put smo dobili dokument koji je tako urađen da iz svake oblasti možemo vrlo jasno i brzo vidjeti šta se u kojem dijelu radi. Posebno me raduje ova oblast iz društvenih djelatnosti pod tačkom 22. da smo pristupili izradi glavnog projekta gradskog stadiona u Ilijašu. Nadam se da ćemo u Ilijašu dobiti i taj sportski kompleks koji će građanima Ilijaša biti na raspolaganju tako da naši sportisti ne moraju ići u Sarajevo na treninge.

ALMIR ŠPIODIĆ – vijećnik BPS-a

Zahvalio bih se na transparentnom i objektivnom Operativnom planu načelnika, a ono što bih rekao jeste da sam primjetio da se neki projekti iz prošle i prethodne godine provlače kroz ovaj Operativni plan i nadam se da će se ove godine realizovati. Kada su u pitanju Podlugovi put Alića Bara-Vratuša koji je makadamski, mislim da bi nije puno skup da se uradi.

MIRSAD OSMANOVIĆ – vijećnik SDP-a

Imam poruku za načelnika od građana naselja Kamenice. Kada se tiče podzide za mezarje u Šehovićima, građani su me zamolili da Vas podsjetim i ako može da to uvrstite u ovaj Operativni plan. Meni su kazali da ste upoznati sa ovim i bili ste na licu mjesta. Rekao sam da ne bih kvario ova dva dokumenta, ali moram reći da neki vijećnici koji su non stop zadovoljni sa nekim stvarima, mnogo su više novca dobila u paušalima, nego što su projekti koji su značajni (pola miliona i milion KM) trebali biti realizovani, a nisu.

MAHIR DEVIĆ – predsjedavajući

Zaključujem raspravu po ovoj tački dnevnog reda i zamolit ću načelnika da odgovori na ova pitanja. Samo informacija za vijećnike – dobro je da smo se mi uspjeli izboriti za isti nivo sredstva i od Direkcije za ceste KS u visini od 1.200.000 KM za ovu godinu i sredstva od OKFŠ su sinoć raspoređivana na nadležnim organima tako da su i ta sredstva u visini od 1.200.000 KM i taj kontinuitet od dva miliona i više će biti za putnu infrastrukturu.

ALAN ŠERAK – vijećnik SDP-a

Nisam znao da si ti predsjedavajući u funkciji načelnika. Pitanje sam postavio načelniku, a na predsjedavajućem i sjednicu treba voditi kako treba da se vodi, a meni ne trebaš ništa obrazlagati.

MAHIR DEVIĆ – predsjedavajući

Kolega Alane, nisam vam dao riječ i zamolit ću Etičku komisiju da razmotri ovo i dostavi pismeni izvještaj za narednu sjednicu.

AKIF FAZLIĆ – općinski načelnik

Dakle, kada je u pitanju generalno Operativni plan, ovdje su dati ključni važni projekti. Ovdje će biti uvijek nekih malih projekata koji će se realizirati iz zajedničkih stavki. Pitanje popravke ceste - iz stavke investicionog održavanja, ili mali projekti po mjesnim

zajednicama. Dakle, tako je kada je u pitanju javna rasvjeta. Neće biti problem ni kada neko od vijećnika traži postavljanje rasvjetnih tijela gdje objektivno postoje razlozi za postavljanje. Kada je u pitanju Direkcija za ceste i iznos sredstava, realizacija prošle godine 2.100.000 KM i plan u ovoj godini 1.200.000 KM, ovdje želim precizno da pojasnim. Direkcija je implementirala 2.100.000 KM iz prošle godine, dakle iz svog budžeta koji je bio 1,1 milion KM, a ostalo iz drugih sredstava gdje je Direkcija i gdje smo mi uspjeli preko Ministarstva saobraćaja KS i drugih izvora da obezbjedimo Direkciji da implementira ta sredstva. Dakle, u ovoj godini ovih 1.200.000 KM je onih 1.100.000 KM iz prošle godine. Znači, finansijski plan Direkcije je 1.200.000 KM i ja sa nadam da ćemo i u ovoj godini preći 2 miliona KM. Vodimo aktivnosti da Direkcija i ove godine implementira 2 miliona, ali iz sredstava koja ćemo obezbjeđivati da li iz kredita KS, da li iz budžeta Ministarstva saobraćaja KS ili nekih drugih izvora. Želim također kazati, a svi znate da je finansijski plan Direkcije cca 14 miliona za sve. Znači, održavanje, zimska i ove rekonstrukcije i da je ovih 1.200.000 KM zaista veliki uspjeh da se nađe u planu za općinu Ilijaš.

Kada je u pitanju grijanje područnih škola ja prihvatam prijedlog da ne ostane niti jedna škola, a praktično bi ostala škola Kamenica, a nama iz škola nije došla ova vrsta zahtjeva, ali znači da neđemo prostora u toku godine da se i ona uvrsti i da obuhvatimo sve područne škole kada je u pitanju grijanje.

Pitanje kanalizacije u Han Misoči – ona je urađena prije deset godina i ovdje želim potencirati da je u MZ Misoča urađen primarni vod koji je finansirala općina i kanton i da je sekundarna mreža finansirana od strane građana i izvođena velikim dijelom od strane građana i javnog komunalnog preduzeća i mislim da i ovaj potez spada u to, a primarni vod je radila firma "Halilović".

U ovom Operativnom planu ima projekata koje nismo realizirali u prošloj godini, a možda neki čak i iz ranijeg perioda, i ja to stalno potenciram i želim da to budu projekti u prioritetu koji će se prvi realizirati u ovoj godini, a onda nastaviti sa novokandidovanim projektima.

Pitanje puta Alića Bara, realizacijom ovog Operativnog plana to je slijedeći prvi prioritet. Osim toga što smo to tako postavili imamo malo razmišljanja vezano generalno za komunikaciju iznad stadiona i povezivanja Alića Bare i želimo da to definišemo projektno i kroz regulacioni plan i taj put stavimo, a svakako u narednoj godini on dolazi u nulti prioritet.

Pitanje podzida u Kamenici, nekoliko puta sam bio tu i on je djelimično urađen, a put je od interesa za Kanton i Direkcija za ceste ga održava, ona je uradila dio podzida i to uradila na dijelu na kom građani nisu htjeli nego na drugom, i to ostaje otvoreno da se to završi.

MAHIR DEVIĆ – predsjedavajući

Načelnice zamolit ću vas vezano za područne škole, imamo Gajeve i Kamenicu, a u Dragoradima mreža već postoji koja je na neki način bila problematična u smislu da je (kada je humanitarna organizacija vršila opremanje) ostalo u betonu i ono ne funkcioniše. Malešiće smo riješili iz sredstava ministarstva, sada nisam siguran da ćemo sa sredstvima od 7 ili 7500 KM to moći rješavati ili da možda usvojimo zaključak da se o tome povede računa u ovoj godini ili da ovu vrstu priče ostavimo za narednu godinu, jer će to koštati daleko više od 7.000 KM.

Podržavam da ovo riješimo, samo je pitanje da li da ovo stavimo na papir što možda u ovom momentu nećemo moći riješiti ili da usvojimo zaključak ili za narednu godinu.

RASIM ŠEHIĆ – vijećnik SDA

Mogu vam samo sugerisati možda kao što smo već pominjali da u narednoj godini to

kvalitetno riješimo i da nadležna služba ispita šta je potrebno za potpuno utopljavanje i sistema grijanja, a u sklopu toga je porodična ambulanta.  
AKIF FAZLIĆ – općinski načelnik

Predlažem zaključak da škole dostave svoje potrebe sa predmjerima da dobijemo okvir sredstava i da to onda tretiramo kroz određene aktivnosti i prioritete

SEAD ŠEHIĆ – vijećnik SBB-a

Budžetom je bila predviđena gradnja gradske pijace, a nisam vidio da je u Operativnom planu.

MAHIR DEVIĆ – predsjedavajući

Možda nisi vidio, ali ima to u Operativnom planu.

Diskutanata po ovoj tački dnevnog reda više nije bilo, pa je OV-e jednoglasno usvojilo

Operativni plan općinskog načelnika i službi za upravu općine Ilijaš za period  
01.01.-31.12.2017. godine

uz Zaključak

Zadužuje se "menadžment Osnovne škole "Srednje" da za područne škole "Gajevi" i "Kamenica" dostavi projekat ili da predloži najbolje rješenje u smislu zagrijavanja istih, kako bi navedeni projekti bili adekvatno tretirani u skorijoj budućnosti.

AD-5

Prijedlog Odluke o dodjeli javnih priznanja Općine Ilijaš za 2016. godinu

MAHIR DEVIĆ – predsjedavajući

Komisija za javna priznanja, obilježavanje historijskih događaja i ličnosti i zaštitu kulturnog i prirodnog naslijeđa je sačinila prijedlog Odluke, a izvještaj je u prilogu.

ALAN ŠERAK – vijećnik SDP-a

Volio bih da je prisutan predsjednik Komisije i da nam obrazloži ovaj prijedlog Odluke i postavljam pitanje predsjedavajućem gdje je i zašto predsjednik ove Komisije nije prisutan?

MAHIR DEVIĆ – predsjedavajući

Kada je u pitanju Komisija, prihvatam da smo mogli pozvati predsjednika Komisije, ali dobili smo izvještaj u kojem je sve napisano i navedeni svi prijedlozi. Možda smo i mogli pozvati predsjednika, ali imamo sve u pismenoj formi.

ALAN ŠERAK – vijećnik SDP-a

Dobili smo Odluku u kojoj oni predlažu koga već predlažu, a u izvještaju su naveli

karakteristike pojedinaca koji su kao prijedlog prošli, ali nisu naveli karakteristike ostalih koji su bili predloženi. Simptomatično je da nekakva mjesna zajednica predlaže kolektivna priznanja za osnovu školu, a ista ne djeluje na području njene mjesne zajednice. Jeste da je ovo sve bilo dirigovano, jeste da mi iz godine u godinu ovu nagradu sve više i više devalviramo. Ovo je plaketa koju treba da dodijeli općinsko vijeće u ime svih građana općine Ilijaš. Ovo što vi radite je tzv. demonstracija sile, gdje želite da nagradite bivšeg podpredsjednika Stranke demokratske akcije, gdje želite da nagradite predsjednika mjesne organizacije Stranke demokratske akcije, te želite da nagradite kolektiv na čijem čelu se nalazi sam predsjednik Stranke demokratske akcije. Dakle, vi ste faktički privatizovali općinu Ilijaš i radite sve ono što odgovoran političar ne bi trebao da radi. Bilo je itekako kvalitetnijih prijedloga od ovih koji su predloženi u Odluci. Nisu nominacije, broj nominacija koje su vršili, nikakav kriterij po Pravilniku. To ne postoji. Zamolit ću vas da tu praksu ubuduće ne provodite. SDP-e nije nikoga predložio i nije nam padalo na pamet, pogotovo poslije onog cirkusa od prošle godine kada smo dali nadležnost načelniku, a isti dodijelio svom predsjedniku. Valjda je trebao neko biti uslikan i pojaviti se pred 200-300 ljudi i pojaviti se kao nekakav "aman zaman" super menadžer ili ne znam ni ja šta. Dakle, ovo što je ponuđeno (mi ćemo amandmanski djelovati) i ako amandman ne dobije podršku, SDP-e će se izuzeti od glasanja i u ovom cirkusu nećemo učestvovati.

MUHAMED HANDŽIĆ – vijećnik BPS-a

Imam primjedbu na Komisiju, njenog predsjednika ili zamjenika koji je trebao da bude prisutan na ovoj sjednici. Nekada sam bio u ulozi predsjednika ove Komisije i uvijek ste tražili da budem prisutan na sjednici i obrazložim prijedlog Komisije. U prošlom sazivu, a evo i u ovom sada, ovi što su predsjednici, a neću se baviti iz koje političke partije dolaze, ali zaista ti ljudi ne dolaze da nam elaboriraju prijedloge. Drugo, oblik Odluke mi nismo usvojili na 25. sjednici Vijeća u prošlom sazivu u decembru 2014. godine. On je sasvim drugačiji. Pravilnik za dodjelu priznanja se takođe nije ispoštovao onako kakav smo mi donijeli na toj 25. sjednici prošlog saziva Vijeća. Ne znam čime se rukovala ova gospoda iz ove Komisije, a sigurno nije Pravilnikom i nije nam dostavila prijedlog Odluke valjan, ali je činjenica da su se rukovali brojem pristilih prijedloga, pa je tu vladala čitava utrka i zvanje telefonima "predloži ovog, predloži onog". Da ja ne bi paušalno išao od jednog do drugog i neću nikog personalno da pominjem iz ovih prijedloga, jer nije lijepo i nisam kompetentan da cijenim da li je neko zaslužio ili nije, ali ima vjerovatno onih koji imaju bolje reference. U tom smislu me čudi, a vi kao najodgovorniji od nas svih, naš predstavnik, niste reagovali na prijedlog gospodina Šehić Sahludina koji ima 3 zlatne medalje sa regionalnog odnosno balkanskog, evropskog i svjetskog prvenstva. Sve njegove diplome i priznanja su priloženi i još nije dobio od mjesne zajednice i općine priznanje i nije mogao proći za dodjelu ove plakete. Ove ljude koji su predložni neću pominjati, jer nije lijepo, ali molim vas, takvog čovjeka imamo jednom u sto godina na području općine Ilijaš, najsnažnijeg čovjeka u BiH i mi kao Vijeće to ne znamo prepoznati ili nećemo. Je li sramota vijećnici dići ruke za nekog drugog, a ne staviti na prvo mjesto ovog čovjeka? Dalje, dodjeljuju se plakete i najbrojana su dva pojedinca i jedan kolektiv, to je sasvim odvojeno i zato i govorim da ova Odluka drugačije treba da izgleda.

Uz obrazloženje ovog ko je naveo u izvještaju ovdje je zaista sramotno. Sada me tjerate da ne dam podršku ovim ljudima koji su predloženi, i vjerovatno su zaslužili, ali možda ne kao ovaj o kojem sam govorio, ali i oni su zaslužili, zato što nismo proveli sve potrebne procedure. To je najblaže što sam imao reći. Trebalo je dosta toga da je ovdje predsjednik ili zamjenik predsjednika Komisije da im se kaže da li ih je stid gledati nas vijećnike u oči, jer mi smo ozbiljni ljudi koji predstavljamo građane.

MAHIR DEVIĆ – predsjedavajući

Pridružujem se dijelu priče vezano za sportske rezultate koje je ovaj čovjek postigao i mi to trebamo tretirati na neki način, ali jednostavno nekada nismo u mogućnosti da sve to odjednom uradimo. Podržavam da su svi ovi ljudi dali neku vrstu doprinosa, ali Komisija treba dati prijedlog Odluke i s ovim se svijet ne završava i postoji načina da mi kao Vijeće nadrastemo neke stvari i da iskažemo čestitost za oblast sporta itd. Imamo izbor sportiste godine i neke druge aktivnosti i zaista podržavam da svi građani koji su ostvarili neku vrstu rezultata da ih mi kao Vijeće nagradimo i upratimo njihove rezultate. Ovo nikako nije omalovažavanje tih rezultata, već jednostavno odluka je takva kakva je. Za sve ove predložene ljude cijenim da su zaslužili ovu vrstu nagrade, a je li mogao i ovaj kolega dobiti nagradu, naravno da jeste, ali ne može sve stati u jednu vrstu priče, tako da nas pozivam da podržimo da ljude koji su predloženi ne problematiziramo, jer oni su sigurno dali svoj doprinos u mnogim oblastima društvenog i ekonomskog života na području općine Ilijaš, a da povedemo računa o navedenom prijedlogu ovog čovjeka i slažem se da je to nešto zaista novo. Pred njim je karijera i mi to trebamo podržati i finansijski i nagraditi u nekom narednom periodu. Ovo nikako ne treba smatrati da je neko protiv, jer jednostavno su neki ljudi prije radili, sada dolaze novi i hvala Bogu da je tako.

SEAD ŠEHIĆ – vijećnik SBB-a

Što se tiče prvog prijedloga – Demirović Nermin, lično smatram da je on svojim radom zaslužio da mnogi ljudi sa područja općine Ilijaš rade u "Sarajevo-šumama" i za njega bih uvijek glasao.

Prijedlog – OŠ "Stari Ilijaš" – škola je radi obrazovanja i obje bih ruke za djece podigao.

Međutim, kada je u pitanju prijedlog – Dževad Alispahić, u biografiji je naveo da je bio pripadnik Armije BiH, to je laž.

Svi znate da sam ja izgubio oca i amidže kao pripadnike vojske Armije BiH i smatram da je to lično uvreda za mene i sve borce, jer najblaže rečeno, on je zaobišao istinu. Dalje, naveo je da je bio nešto za izgradnju groblja u Ljubnićima, ali to nije tačno i to može potvrditi predsjednik savjeta mjesne zajednice Mrakovo, jer se on zalagao za nešto drugo i nikakve zasluge on tu nema. Treće, naveo je da je bio zaslužan za izgradnju džamije u Ljubnićima, ali ja sam kontaktirao tamo ljude koji su kazali da je bio protiv izgradnje. Radi se o sasvim upitno moralnoj osobi.

Ako se za ovo glasa u paketu, ja za njega ne mogu glasati i predlažem ako može da se ovi prijedlozi razdvoje i da glasamo pojedinačno.

MAHIR DEVIĆ – predsjedavajući

Ja bih nas zamolio da ipak ostanemo na jednom nivou na kome treba da bude općinsko vijeće. Ja bih mogao reći na hiljade stvari u kojima je navedeni kolega učestvovao. Bilo je predsjednika savjeta kojima smo ranije davali nagrade, a manje su učinili. Razumijem potrebu da se neko podrži ili ne podrži, ali vas molim da ne idemo u neke detalje. Ne želim nikakav prijedlog ni braniti, niti govoriti kako će neko glasati, ali molim vas da kao Vijeće ostanemo na jednom nivou. Ono što nismo uspjeli danas da zadovoljimo, da to zadovoljimo u narednom periodu. Za Odluku se glasa u paketu, a ako SDP-e ima amandman, trebate reći ko je predložen za kolektivnu nagradu ili ostajete pri predloženom. Znači, kolektiv ostaje OŠ "Stari Ilijaš".



SEAD ŠEHIĆ – vijećnik SBB-a

Samo hoću da kažem da je taj čovjek već jednom nagrađen, jer mu je kćerka primljena u radni odnos. To je toliki megaloman i što nije rekao dosta je. Treba reći istinu.

SEMIR DIZDAREVIĆ – vijećnik DF-a

Nakon što je kolega Šehić ovo iznio, a razmišljao sam i o ovome što je gospodin Handžić govorio i očito se Komisija nije vodila ni brojem pristiglih prijava, jer imaju neki koji imaju i više. Moj prijedlog je da se, obzirom da se bliži dan općine, organizuje hitna sjednica možda sutra i pozove predsjednik Komisije ili cijela Komisija da daju obrazloženje.

Ovo je ipak nagrada kojom se treba ponositi svako ko je dobije, a i mi kao Vijeće da se ponosimo onim kojima dajemo tu nagradu.

To je prijedlog da se na taj način pokuša ovo riješiti.

MAHIR DEVIĆ – predsjedavajući

Nemamo vremena za hitnu sjednicu i Odluku moramo donijeti sada, zbog izrade, zbog blizine dana općine.

ALAN ŠERAK – vijećnik SDP-a

Suština ove cijele priče je da se nažalost Komisija nije vodila za period za koji se nagrada daje. Nagrada se daje za 2016. godinu. Ne možemo se pozivati šta je bilo nekada davno. Mi tretiramo period od 01.01. do 31.12.2016. godine i Komisija se trebala rukovoditi Pravilnikom, a ne kako joj je neko vjerovatno nazvao i izdiktirao par imena i to je to.

AKIF BEŠLIJA – vijećnik SBB-a

Predlažem da napravimo pauzu prije zaključenja rasprave.

MAHIR DEVIĆ – predsjedavajući

Zaključujem raspravu, pa ćemo napraviti pauzu. Imat ćemo amandman SDP-a i ako dobije potrebnu većinu onda glasamo za prijedlog Odluke, a ako ne, onda glasamo za ovakav prijedlog Odluke.

Pauza od 11:40-11:50h

MAHIR DEVIĆ – predsjedavajući

Dajem na glasanje amandman I SDP-a na član 2. tačku 1. gdje se riječi "Demirović Nermin" mjenjaju i glase "Hajdarević Đenana".

Općinsko vijeće je glasalo sa 4 glasa ZA, 14 PROTIV i 4 UZDRŽANA.

Konstatovano je da amandman nije dobio potrebnu većinu glasova.

ALAN ŠERAK – vijećnik SDP-a

Zatražio je pojedinačno glasanje.

ZA su glasali: Alan Šerak, Damir Filipović, Mirsad Osmanović i Edhem Hasanović.

PROTIV su glasali: Mahir Dević, Anel Bumbulović, Muamer Dervišević, Alma Omerović, Mehmed Sinanović, Saudin Durmić, Armin Matoruga, Semir Dedić, Melisa Matoruga, Alen Hasković, Akif Bešlija, Sead Šehić, Muhamed Handžić i Almir Špodić

UZDRŽANI su bili: Adem Alić, Halid Dizdarević, Rasim Šehić i Semir Dizdarević

Zatim je općinsko vijeće glasalo za amandman II SDP-a na član 2. tačku 2. gdje se riječi "Alispahić Dževad" mjenjaju i glase "Šehić Sahludin-Žutko".

Općinsko vijeće je glasalo sa 9 glasa ZA i 14 PROTIV.

Konstatovano je da amandman nije dobio potrebnu većinu.

ALAN ŠERAK – vijećnik SDP-a

Zatražio je pojedinačno glasanje.

ZA su glasali: Alan Šerak, Damir Filipović, Mirsad Osmanović, Sead Šehić, Muhamed Handžić, Almir Špodić, Edhem Hasanović, Semir Dizdarević i Meho Džindo.

PROTIV su glasali: Mahir Dević, Anel Bumbulović, Muamer Dervišević, Alma Omerović, Mehmed Sinanović, Adem Alić, Saudin Durmić, Armin Matoruga, Semir Dedić, Halid Dizdarević, Rasim Šehić, Melisa Matoruga, Alen Hasković i Akif Bešlija.

Zatim je predsjedavajući dao na glasanje prijedlog Odluke kako je predloženo u dnevnom redu.

Općinsko vijeće je sa 16 glasova ZA, 5 PROTIV i 2 UZDRŽANA donijelo

Odluku o dodjeli javnih priznanja Općine Ilijaš za 2016. godinu

uz napomenu da se ispoštuje zaključak vezano za sportistu Šehić Sahludina.

#### AD-6

Prijedlog Odluke kojom se daje saglasnost općinskom načelniku za provođenje zakonom propisane procedure postupka rekonstrukcije i promjene namjene dijela nekretnine – zgrade (aula Kulturnog centra Ilijaš)

AKIF FAZLIĆ – općinski načelnik

Ovdje se radi o prostoru koji se zove aula i s aspekta interesa građana se spominjalo da vidimo koji je interes građana da građani imaju aulu u KSC-u.

Mi prostor aule mjenjamo za prostor u kome će biti smješten centar za održivi razvoj i podrška biznisa kao prostor u kojem će se promovirati sve aktivnosti općine Ilijaš, a prije

svega, iz biznis sfere, a onda i iz svake druge, pa i kulturne. Kroz ovaj projekat dobit ćemo i etažu iznad sa četiri prostora koji, prije svega, želimo da budu prostori za rad naših kulturnih udruženja i da definitivno smjestimo kulturna udruženja u tom prostoru. Ono što će i dalje ostati pravi problem za njihov rad u smislu bina, sala, jer ova postojeća sala možda je predimenzionirana i u smislu troškova njenog održavanja ova društva je ne koriste. Međutim, u doglednom periodu trebat ćemo još tu fazu njihovog rada improvizirati dok u konačnici to ne riješimo. S tog stava ostajemo pri ovoj tački dnevnog reda i smatram da nema nikakvih prepreka, niti zakonskih niti ovih, za njeno donošenje. Ovo nije nivo korekcije regulacionog plana da se nešto mijenja za koji također ima nadležnost općinski načelnik, ali evo mijenja se namjena. Mi smo na vijeću donosili odluku kada smo nadzimali zgradu općine i želimo kroz ovo tijelo da i ovaj prostor definišemo i da idemo u realizaciju toga, naravno ako općinsko vijeće podrži ovu odluku.

DAMIR FILIPOVIĆ – vijećnik SDP-a

Da li je za ovako nešto, prema zakonu na koji se poziva Odluka i prema Zakonu o principima lokalne samouprave, neophodno bilo obaviti javnu raspravu?

AKIF FAZLIĆ – općinski načelnik

Nije bilo potrebno.

Diskutanata po ovoj tački dnevnog reda više nije bilo, pa je Općinsko vijeće sa 16 glasova ZA i 7 protiv donijelo

Odluku kojom se daje saglasnost općinskom načelniku za provođenje zakonom propisane procedure postupka rekonstrukcije i promjene namjene dijela nekretnine – zgrade (aula Kulturnog centra Ilijaš)

AD-7

Prijedlog Odluke o davanju saglasnosti za provođenje postupka dodjele koncesije za eksploataciju mineralne sirovine – krečnjaka na lokalitetu "Sabanci" općina Ilijaš

Sjednicu dalje vodi zamjenik predsjedavajućeg Alen Hasković.

AKIF FAZLIĆ – općinski načelnik

Pravni osnov za donošenje ove Odluke sadržan je u članu 6. stav 1. tačka 13. Zakona o koncesijama kojim su propisani predmeti koncesije ( u konkretnom slučaju: istraživanje i/ili korištenje nemetalnih mineralnih sirovina uključujući sekundarne mineralne sirovine propisane posebnim zakonom), a u vezi sa članom 20. stav 2. istog Zakona kojim je propisano da u slučaju samoinicijativne ponude za dodjelu koncesionog ugovora, ponuđač je dužan između ostalog dostaviti riješena prethodna pitanja – saglasnost općinskog vijeća za provođenje postupka dodjele koncesije.

S aspekta prostora sve geološke karte mineralnih sirovina koje je uradio federalni nivo i kanton ovo područje je definisano kao perspektivno područje za minerale i krečnjake. To je jedan osnov. Drugi osnov jeste ovo što je i Mirsad govorio, jeste naša želja da konačno počnemo ostvarivati benefite od resursa koje imamo, prije svega u zapošljavanju, a i u prihodima. Nažalost, Kanton Sarajevo je vjerovatno kanton koji je najmanje iskoristio ovu priliku zbog, prije svega, nespremenosti da uđe u realizaciju projekata ovog tipa. Zbog

toga mi danas imamo situaciju da na području Kantona Sarajevo vjerovatno nema niti jedan aktivan kamenolom koji radi i da građevinska operativa ovu vrstu materijala mora kupovati izvan Kantona Sarajeva. Sigurno, po ovim kartama, itekako ima ove vrste materijala, odnosno rudnih bogatstava. U tom smislu, ja kao predlagač ove Odluke, želim da se na području Kantona Sarajevo stvore uslovi da imamo jedan kamenolom koji može funkcionisati i donositi ekonomski benefite. Međutim, ovo je tek ona najpočetnija faza. Dobivanje i dolazak do koncesionog ugovora, ono što je Mirsad govorio, je dug put gdje se moraju uraditi sve analize, izvršiti analize količine i obima u eksploatacionim poljima gdje se moraju napraviti studije uticaja na okoliš, gdje se mora niz stvari u postupku dodjele koncesije pripremiti i Odluku o dodjeli koncesionog ugovor ide na Skupštinu, odnosno Vladu Kantona Sarajevo. Mi ne trebamo biti smetnja niti jednom privrednom društvu, pogotovo s područja općine Ilijaš, u pokušaju da napravi nešto što jeste koncesija. Zna da smo imali tri kamenoloma. Mi smo kroz svoj prostorni plan zatvorili jedan, a to je kamenolom u Zenik, zatvorili smo kamenolom u Vrelima prema Gajevima i da imamo kamenolom u Rači koji je zbog ne ispunjavanja ugovornih obaveza iz koncesionog ugovora zatvoren. Po svim aspektima i logikama i ovo što govorimo i o menadžerskom odnosu, ja cijenim da ovu Odluku treba podržati i naravno pratiti poštivanje svih drugih obaveza koje će prije svega voditi Ministarstvo privrede. Komisija za dodjelu koncesija mora imati jednog člana iz općine tako da ćemo mi ovaj proces u potpunosti kontrolirati.

DAMIR FILIPOVIĆ – vijećnik SDP-a

Na početku prošlog mandata imao sam razgovor sa načelnikom gdje sam predlagao da se na području općine Ilijaš napravi geološka karta, te da se u saradnji sa nadležnim ministarstvom i Vladom Kantona Sarajevo raspišu javni pozivi za to kako bi općina ostvarivala dobit i benefite koji se pružaju iz ugovora o koncesiji. Povodom ove Odluke predložiti ću zaključak da općine Ilijaš angažuje adekvatnog eksternog saradnika po ugovoru o djelu ili neki drugi način, da se napravi geološka karta, te da u saradnji sa kantom se raspiše javni poziv za sva prirodna bogatstva na području općine Ilijaš, koji mogu da se eksploatišu i ne ugrožavaju sam okoliš.

MIRSAD OSMANOVIĆ – vijećnik SDP-a

Nije mi jasno zašto se saglasnost daje na tri godine kada cijeli proces ne traje duže od devedeset dana. Ovo što je načelnik iznio još je više učvrstio moje uvjerenje da ne treba dati saglasnost. Ne treba nas hvatati na ovo "biznis i ekonomska opravdanost", jer je sam rekao da smo zatvorili dva rudnika koji su bili obuhvaćeni planskom dokumentacijom, a evo i ovaj treći. To je još jedan od dokaza koji su manje bitni što mi pravimo kamenolom u mjestu gdje se treba razvijati turizam, lovstvo, sport i gdje Zakon o zaštiti prirode izričito govori da će eksplozije toliko uznemiravati životinjski svijet, staništa će biti uništena, a i ko će blizini kamenoloma praviti bombastične najave izgradnje hotela, motela itd. Kada se tiče zaštićene zone Bijambare, to je blizu i tu će doći do uznemiravanja, a da ne govorim o ljudima koji su odlučili da se gore odmaraju.

Da vas još upozorim, taj kamenolom treba da bude na prostoru koji će, po meni, ili ugroziti bezbjednost ili blorikarati povezanost Bijambara sa Gajevima. Žao mi je ptica. Vrlo brzo, ako neko bude pokrenuo, raditi strategiju razvoja, a kamenolom se nikako ne uklapa. Nismo mi protiv biznisa, ali da nas neko ucjenjuje da mi prirodno blago - javno dobro, žrtvujemo zbog prihoda koji će po postojećoj zakonskoj regulativi biti maksimalno 80.000 KM zarade, a za jedan dan ćemo imati štete kada nam se razbježe životinje, kada ljudi počnu napuštati vikendice i kada neko bude trebao uložiti u motel i gubici će se mjeriti

milijonima. Ovo govorim kao čovjek. Godine 1935. kralj je ovo oduzeo od moje porodice, nemojte da mi ovo oduzimamo našoj djeci.

**ALMIR ŠPIODIĆ – vijećnik BPS-a**

Ako će općina Ilijaš i građani imati interesa ja sam za to. Iz načelnikovog izlaganja sam zaključio da ćemo imati. Ako uzmemo u obzir općinu Kreševo koja živi od kamenoloma i koja je jedna od najrazvijenijih općina u federaciji i koja bukvalno nema niti jednog nezaposlenog, upravo živi od prodaje kamena i prirodnih bogatstava. Kada je u pitanju turizam, mi nismo na moru pa da imamo neki turizam. Mi ovdje pričamo o turizmu kada trebamo da “zamažemo” oči i da nam nije dijaspore ništa od turizma. Svakako, podržavam ovaj prijedlog Odluke.

**AKIF FAZLIĆ – općinski načelnik**

Ja sam u svom izlaganju kazao da su karte urađane. Postoje karte sa federalnog nivoa, kantonalne karte i karte koje su urađene za potrebe izmjena i dopuna prostornog plana Kantona Sarajevo i te karte postoje u Zavodu i te karte su utvrdile da je ovaj prostor perspektivan. Znači za istraživanje za mineralne sirovine. Dakle, to je jedan osnov. Drugi osnov, ovdje se vjeovatno želi polemizirati što samoinicijativna ponuda, što ne javni poziv. Možemo mi o tome pričati, ali da napomenem da je ovo zemljište u privatnom vlasništvu, ovo je zemljište u vlasništvu firme koja želi da iskoristi pravo koje joj zakoni ove države omogućavaju da krene u jedan proces i zašto mi želimo to na početku spriječiti i ja ću to ponovo reći, ilijašku firmu, da pokuša iskoristi to pravo. Pitanje opšteg javnog poziva nije naša nadležnost. Znači, dodjela koncesije je nadležnost kantona i kanton to može pokrenuti i mi to ne osporavamo. Ja ću se uvijek boriti da ilijaška firma dobije ovo i ona već ima predispozicije da dobije to, jer je zemljište privatno vlasništvo. Prostorni plan je nešto što ne spriječava ovo, a da ne pričamo sada o Bijambarama. Mi imamo prostorni plan i za zaštićeno područje Bijambare, a ovo je izvan treće zone ovog prostornog plana i ne bi niko ušao u to. Međutim, ponovo potenciram da će svako ko uđe u ovo zaista proći jednu žestoku proceduru izrade studija vezano za zaštitu okoliša, izrade raznoraznih elaborata, istražnih radova i svega onoga što će morati se verifikirati i proći izvršnu vlast kantona, kroz nadležno ministarstvo i Vladu kantona. Ja želim da mi pravimo ambient da svi imaju šansu ovdje u Ilijašu, ali naravno da je moraju na zakonit i regularan način ostvariti, a ne da ga mi na početku zaustavimo iz nekih argumenata koji za mene nisu argumenti.

**DAMIR FILIPOVIĆ – vijećnik SDP-a**

Apsolutno nije politiziranje i ne zanima me koja je firma u pitanju. Cilj mi je da otvorimo malo po pitanju ove tematike. Ako je već formirana geološka karta, smatram da bi trebalo vi kao načelnik, a u tom pravcu ću i formulirati zaključak, da upitujete pismo namjere prema nadležnom ministarstvu, odnosno Vladi Kantona Sarajevo da raspiše javni poziv pa da sa ove eksploatacije i ugovora koji nudi, odnosno benefite koje nudi ugovor o koncesije imamo i sa drugih iskopina. Samo je to u pitanju. Znači, ako ćemo ići u ovom pravcu, da se širimo, jer je područje općine Ilijaš bogato mineralnim prirodnim bogatstvima.

**AKIF FAZLIĆ – općinski načelnik**

Ovu vrstu zaključka ja podržavam generalno u smislu da se potencijali općine Ilijaš, prije svega, afirmišu, marketinški plasiraju, da vodimo neke aktivnosti koje će još više zainteresirati potencijalne poduzetnike u oblasti koncesija za ono što kroz geološke karte

verificirano da gore imamo. To bi, po meni, bio okvir zaključka, a sve dalje bi izašli iz okvira nadležnosti.

DAMIR FILIPOVIĆ – vijećnik SDP-a

Prijedlog zaključka glasi: Zadužuje se općinski načelnik da uputi pismo namjere prema nadležnom ministarstvu Kantona Sarajevo za pokretanje javnih poziva prema usvojenoj geološkoj karti.

Općinsko vijeće je jednoglasno donijelo

## ZAKLJUČAK

Zadužuje se načelnik Općine Ilijaš da uputi pismo namjere prema nadležnom ministarstvu Kantona Sarajevo za pokretanje javnih poziva prema usvojenoj Geološkoj karti.

Zatim je zamjenik predsjedavajućeg dao na glasanje predloženu tačku dnevnog reda.

Općinsko vijeće je sa 18 glasova ZA i 4 UZDRŽANA donijelo

Odluku o davanju saglasnosti za provođenje postupka dodjele koncesije za eksploataciju mineralne sirovine – krečnjaka na lokalitetu "Sabanci" općina Ilijaš

AD-8

Prijedlog Odluke o pristupanju izradi Regulacionog plana  
"Apartmansko naselje Sovrle 2" – Ilijaš

MELIHA AVDIBEGOVIĆ – pomoćnica načelnika

Izrada provedbenog planskog dokumenta inicirana je od strane investitora "DRB Trading" d.o.o. Sarajevo i općine Ilijaš radi rješavanja potreba za novom stambenom izgradnjom, a sve u cilju kvalitetnijeg funkcionisanja i daljeg usmjerenog razvoja općine. Investitor predlaže izgradnju 79 apartmanskih stambenih objekata sa pratećom saobraćajnom i komunalnom infrastrukturu. Prostor u granici obuhvata Plana je lokaciono smješten u urbanom dijelu Ilijaša, u zoni stanovanja-naseljeno mjesto Sovrle prema Prostornom planu Kantona Sarajevo za period 2003. do 2023. godine. Plan se radi u cilju donošenja provedbenog planskog dokumenta kojim će se ovo područje urbanizirati na kvalitetan način, predložiti optimalna organizacija prostora sa kompleksom objekata apartmanskog tipa stanovanja opremljeni kvalitetnom društvenom infrastrukturu, sadržajima sporta i rekreacije, saobraćajnom i komunalnom infrastrukturu, poštujući uvjete zaštite okoliša.

ALMIR ŠPIODIĆ – vijećnik BPS-a

S obzirom da se radi o Podlugovima želim pitati da li je provedena javna rasprava u smislu davanja saglasnosti. Jednom prilikom sam prisustvovao zboru građana koji su izrazili nezadovoljstvo izgradnjom ovog naselja iz razloga što se narušava već postojeća infrastruktura. Prilikom izgradnje putne komunikacije prema apartmanskom naselju došlo je do potkopavanja stambenih objekata i oštećenja postojeće infrastrukture (kanalizacione mreže, vodovodne mreže) u Sovrlama. Znači, interesuje me je li provedena javna rasprava, jer su građani izrazili nezadovoljstvo i negodovanje izgradnjom ovog naselja.

MUHAMED HANDŽIĆ – vijećnik BPS-a

Nadovezat ću se na koleginiu diskusiju obzirom da očekujem odgovor koji će služba dati, a to je "mi ćemo snimiti prvobitno stanje, pa kad oni završe radove, dovest će sve u prvobitno stanje". Radovi traju petnaest godina, ljudi će gaziti po blatu, po kamenju, po obrušenim putevima, jer ja imam iskustva po tome. Naime, radili smo jedan ogranak vodovoda u Bioči i obećali su nam iz nadležne općinske službe da će to vratiti u prvobitno stanje. Neka sada izađu na teren i neka vide kakvo je to prvobitno stanje. Ljudi polomiše vozila, uništili su čitavu dionicu puta i niko ne reaguje iz općinskih službi i taj put nije urađen. Isto će se desiti i sa Sovrlama. Kada mi pričamo o apartmanskim naseljima na nas se naroguše (na odgovorne vijećnike) što smo mi uvijek protiv toga. Dajte da se procedure poštuju i da ne narušavamo našu infrastrukturu koju smo ionako teško uradili.

MELIHA AVDIBEGOVIĆ – pomoćnica načelnika

Radi se o potpuno ne izgrađenom lokalitetu. Tamo još nije ništa zakopano. Ja sam govorila i evo govorim na svakoj sjednici Vijeća, ali da me razumijete, do donošenja Odluke o pristupanju izrade Plana i samog prijedloga plana, ne preskače se niti jedna zakonom propisana procedura. Znači, ovaj zahtjev je podnesen možda prije godinu dana, do donošenja ove Odluke i usvajanja provede se niz Zakonom propisanih procedura i tek onda se predloži Vijeću na usvajanje.

Diskutanata po ovoj tački dnevnog reda više nije bilo, pa je Općinsko vijeće sa 14 glasova ZA i 4 UZDRŽANA donijelo

Odluku o pristupanju izradi Regulacionog plana  
"Apartmansko naselje Sovrle 2" – Ilijaš

AD-9

Prijedlog Odluke o izmjeni podataka od značaja za pravni promet i o izmjeni osnivačkog akta Javnog komunalnog preduzeća "Vodostan" d.o.o. Ilijaš

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Odluku o izmjeni podataka od značaja za pravni promet i o izmjeni osnivačkog akta Javnog komunalnog preduzeća "Vodostan" d.o.o. Ilijaš

AD-10

Prijedlog Odluke o izmjeni člana 1. Odluke Općinskog vijeća Općine Ilijaš br.01/1-02-1726-12/16 od 26.07.2016. godine

SADETA BRKIĆ – pomoćnica načelnika

Prilikom izrade Odluke o neposrednoj pogodbi koja je usvojena na redovnoj sjednici Općinskog vijeća Ilijaš od 26.07.2016. godine i objavljene u ("Službenim novinama Kantona Sarajevo", broj:31/16) parcela označena kao k.č.br.1861/31 K.O. SP\_Podgora kojoj po novom premjeru odgovara parcela k.č.br.28/2 K.O. Ilijaš Grad upisana je kao pristupni put, a u stvari predmetna parcela je po kulturi ostalo neplodno zemljište koje se prema Regulacionom planu "Banovac" nalazi u sastavu građevinske parcele Auto-moto klub Ilijaš.

MIRSAD OSMANOVIĆ – vijećnik SDP-a

Na početku sjednice pitao sam vijećnike zna li neko gdje je ta parcela. Nama se bez razloga imputira da smo protiv privrednika, protiv razvoja, za ove obadvije tačke, ali mi se "bijemo" za opći interes i tražimo od ovog Vijeća da sagleda da li je veći interes zajednice ili je veći interes da dobijemo 10.450 KM. U obrazloženju piše da je greškom napravljeno, ali sada je gospođa Sadeta lijepo objasnila, da je ovo pripremljen prostor za prodaju. Uvažavam potrebe, ali se bojim da ne sagledavamo veći interes, ne umanjujući značaj i što će biti, kakav će prostor biti, ali da ne bi došli za nekoliko godina da uvidimo da smo napravili grešku i uskratili neke stvari koje su od interesa za građane.

Diskutanata po ovoj tački dnevnog reda više nije bilo, pa je Općinsko vijeće sa 16 glasova ZA i 5 UZDRŽANIH donijelo

Odluku o izmjeni člana 1. Odluke Općinskog vijeća Općine Ilijaš br.01/1-02-1726-12/16 od 26.07.2016. godine

AD-11

Prijedlog Rješenja iz imovinsko-pravne oblasti broj:06/1-31-155/17

Diskutanata po ovoj tački dnevnog reda nije bilo, pa je Općinsko vijeće jednoglasno donijelo

Rješenje iz imovinsko-pravne oblasti broj:06/1-31-155/17

Zatim je zamjenik predsjedavajućeg Alen Hasković zaključio šestu sjednicu OV-a Ilijaš u 12:40h.

Zapisničar:  
Maida Habibović

PREDSJEDAVAJUĆI  
OPĆINSKOG VIJEĆA ILIJAŠ

Mahir Dević, prof.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov@ilijas.ba](mailto:ov@ilijas.ba)  
Broj certifikata:20938

